

**ISLAMSKA ZAJEDNICA U BOSNI I HERCEGOVINI
MUFTIJSTVO SARAJEVSKO
MEDŽLIS ISLAMSKE ZAJEDNICE SARAJEVO**

**IZVJEŠTAJ O MEKTEBSKOJ NASTAVI
MEDŽLISA ISLAMSKE ZAJEDNICE SARAJEVO
2018/2019. Š.G. - 1439/1440. H.G.**

SARAJEVO, juni, 2019. godine

GLAVNI IMAM
Doc. dr. hfz. Kenan Musić

1. MEKTEBSKA NASTAVA U ŠKOLSKOJ 2018/19. GODINI

1.1. Mektebi i muallimi

Mektebska nastava na području Medžlisa IZ-e Sarajevo u školskoj 2018/19. godini počela je 08. septembra 2018., a završena je 05. maja 2019. godine. Na području Sarajevskog medžlisa mektebska nastava održavana je u 134 mekteba, odnosno na 159 punktova¹. Nastavu je izvodio 134 muallim, od toga je 87 u stalnom radnom odnosu, te 47 honorarno angažiranih muallima. Također je kao pomoćni muallimi angažirano još 26 osoba iz reda studenata i muallima. Ukupno je u nastavni proces mektebske nastave angažirano 160 muallima.

1.2. Polaznici mektebske nastave

Krajem vjeronaučne godine muallimi su dostavili izvještaje o mektebskoj nastavi. Vjersko-prosvjetna služba medžlisa prikupila je i objedinila podatke o radu muallima za školsku 2018/19. godinu, te na osnovu tih podataka saznajemo sljedeće:

	<i>Školska 2017/18</i>	Školska 2018/19	razlika
- Broj upisanih polaznika	14 049	14 248	199 više
- Broj učenika 1. godine	3124	3169	45 više
- Broj učenika 2. godine	2152	2214	62 više
- Broj učenika 3. godine	2041	2119	78 više
- Broj učenika 4. godine	1913	1929	16 više
- Broj učenika 5. godine	1428	1362	66 manje
- Broj učenika 6. godine	1199	1262	143 više
- Broj učenika 7. godine	971	958	13 manje
- Broj učenika 8. godine	881	908	27 više
- Broj učenika 9. godine	340	327	13 manje
- Redovni polaznici	10 862	10 950	88 više
- Uči u sufari	3138	3100	38 manje
- Uči u Kur'anu	3860	4079	219 više
- Završilo hatmu	867	886	19 više

Uz ovaj pisani izvještaj prilažemo i statističke podatke o mektebskoj nastavi za 2018/19. godinu.

¹ Pod punktom se podrazumijeva dodatni, odnosno drugi mekteb koji je u okviru jednog džemata

2. ONLINE UPIS U MEKTEB

Vjersko-prosvjetna služba Medžlis IZ-e Sarajevo početkom nove školske 2018/19. godine omogućila je roditeljima i polaznicima mektebske nastave **online upis u mekteb**. Roditelji su mogli izravno putem interneta upisati svoju djecu u mekteb, a oni koji su popunjavali printane obrasce, muallimi su te podatke u online bazu. Tako da je napravljena baza podata o polaznicima mektebske nastave, a na dan pisanja ovog izvještaja (15.06.2018) online je upisano 13 357 učenika. Vjersko-prosvjetna služba Medžlisa ima pristup podacima svih mekteba, a svaki muallim putem šifre koju je dobio ima pristup podacima svoga mekteba. Obzirom da je ovo novi projekat vezano za unapređenje mektebske nastave, a za koji je neophodno posjedovanje određenog nivoa znanja iz informatike, neki od starijih imama nisu se baš najbolje snašli na početku. Međutim uz podršku vjersko-prosvjetne službe gotovo svi polaznici mektebske nastave uneseni su u bazu podataka.

Također, uporedo sa ovim projektom uveden je otvoreni broj za mektebsku nastavu na koji se roditelji i polaznici mektebske nastave mogu obratiti za informaciju u svakom trenutku. Veliki broj poziva na ovaj broj bio je početkom nove školske godine, a pitanja su bila uglavnom o terminima i rasporedu održavanja mektebske nastave, te lokacijama na kojima se izvodi nastava.

3. OBILASCI MEKTEBA TOKOM ŠKOLSKE 2018/19 GODINE

U cilju praćenja rada imama na mektebskoj nastavi tokom školske godine, Malik ef. Šljivo, pomoćnik glavnog imama za mektebsku nastavu, u danima vikenda obilazio je mekteb sa ciljem uvida u rad muallima i kontrolu rada u mektebima. Prvenstveno su posjećivani mlađi imami u stalnom radnom odnosu kojima su davane određene smjernice u radu. O svakoj posjeti sačinjen je zapisnik koji je pohranjen u dosije imama.

Zapažanja i određene analize prezentovani su imamima na seminarima.

Također, glavni imam, doc. dr. hfz. Kenan-ef. Musić je prema planu rada posjetio nekoliko mekteba na dan upisa djece u novu mektebsku godinu, zatim tokom godine one mektebe u kojima su primljeni novi imami u stalni radni odnos početkom nove školske godine, te je nadzirao provođenje završnih ispita hatmi za ovu školsku godinu.

4. ZAVRŠNO TAKMIČENJE POLAZNIKA MEKTEBSKE NASTAVE ZA ŠKOLSKU 2018/19. G.

Takmičenje polaznika mektebske nastave na nivou Medžlisa islamske zajednice Sarajevo održano je prema uputstvima Vjersko-prosvjetne službe Rijasetu IZ-e u Bosni i Hercegovini. Takmičenja iz *Kiraeta* i *Test znanja* održana su ove godine na dva nivoa. Preliminarno takmičenje održano je 24. marta 2019. godine u džamijama Šip i Sokolović Kolonija I.

Finalno takmičenje iz discipline *Kiraet* za oba nivoa održano je 31. marta 2019. godine (nedjelja) sa početkom u 14:00 sati u centranj džamiji na Ilidži.

Takmičenje iz discipline *Test znanja* održano je također 31. marta 2019. godine sa početkom u 08:30 sati u osnovnoj školi „Avdo Smilović“ u Buća Potoku.

Detaljniji izvještaj o Završnom takmičenju polaznika mektebske nastave za školsku 2018/19. godinu prilažemo uz ovaj izvještaj.

5. ZAVRŠNI ISPITI – HATME U ŠKOLSKOJ 2018/19. GODINI

Završni ispiti na području Sarajevskog medžlisa provedeni su od 20. aprila do 05. maja 2019. Ispiti su provedeni u 138 mekteba/punktova u kojima je nastavu izvodilo 87 muallima u stalnom radnom odnosu i 46 honorarna muallima. Završnim ispitima pristupilo je 10.915 učenika. Pred komisijom u Kur'anu je učilo 3.681, a od toga je hatmu završilo 787 polaznika mektebske nastave.

U odnosu na prethodnu školsku godinu isti je broj mekteba u kojima su provedeni završni ispiti. Završnim ispitima pristupio je više 722 učenika, a 387 je bilo više učenika koji su učili u Kur'anu, te 112 polaznika više koji su završili hatmu.

Komisija za unapređenje mektebske nastave blagovremeno je upoznala sve muallime o načinu provođenja završnih ispita tako da je u svakoj godini (od 1. do 8. godine) postavljeno po pet pitanja i dato isto toliko odgovora od strane učenika koji su prisustvovao završnim ispitima. Oni polaznici koji uče u Kur'anu imali su priliku da prouče još po jedan ajet ili više. Članovi komisija bodovali su date odgovore polaznika mektebske nastave i o tome sačinili zapisnike.

Završni ispiti za ovu godinu bili su uglavnom radnog karaktera s ciljem da se stekne bolji uvid u rad muallima i znanje polaznika mektebske nastave, te zbog ograničenog vremena za provođenje ispita. Određeni broj imama je u drugom vremenskom terminu upriličio svečanost povodom završetka školske/mektebske godine.

Na osnovu ukupnog zbira bodova koje su polaznici osvojili, dobili smo i najuspješnije mektebe, odnosno muallime na završnim ispitima. Najuspješniji muallimi na završnim ispitima za školsku 2018/19. godinu su:

1. Enver-ef. Hošić /Sokolović kolonija I/.
2. Hazim-ef Krupalija /Butmir/,
3. Resul-ef. Alić /Ilidža/

Vjersko-prosvjetna služba medžlisa predlaže Izvršnom odboru da nagradi najuspješnije muallime sa povećanjem plaće za 9 mjeseci i to:

1. mjesto 10 %, 2. mjesto 9 %, 3. mjesto 8 %, a od 4. do 10. mjesta 5 %

Također predlažemo da nagrade najboljim muallimima uruči glavni imam na prvom redovnom seminaru za imame nakon usvajanja ovog izvještaja.

Uz izvještaj prilažemo poredak mekteba na završnim ispitima za 2018/19. školsku godinu na osnovu osvojenih bodova.

6. KOMISIJA ZA UNAPREĐENJE MEKTEBSKE NASTAVE

Vjersko-prosvjetna služba je u cilju poboljšanja kvaliteta rada na mektebskoj nastavi prije nekoliko godina osnovala je *Komisiju za unapređenje mektebske nastave*. Početkom mektebske 2018/19. godine na osnovu anonimne ankete imama neki članovi Komisije su zamjenjeni sa novim. Komisija je od početka ove školske godine imala nekoliko konstruktivnih sastanaka na kojima su definisane određene aktivnosti vezano za mektebsku nastavu, takmičenje, hatme i vannastavane aktivnosti na nivou Medžlisa.

Komisijom rukovodi mr. Malik Šljivo, pomoćnik glavnog imama zadužen za mektebsku nastavu, a čine je: Hazim-ef. Krupalija, Enver-ef. Hošić, Muhamed-ef. Abaz, mr. Sejid-ef. Strika i Resul-ef. Alić.

7. ONLINE ANKETA RODITELJA POLAZNIKA MEKTEBSKE NASTAVE

U cilju poboljšanja kvaliteta rada u mекtebima Sarajevskog medžlisa, vjersko-prosvjetna služba tokom mјесеца marta 2019. godine uradila je *online anketu roditelja polaznika mektebske nastave*. Anketirano je oko 1000 roditelja koji su na pitanja koja su bila otvorenog i zatvorenog tipa, dali svoja mišljenja na dosadašnji rad u mекtebima, kako njihova djeca doživljavaju mektebsku nastavu, zbog čega djeca odsustvuju sa nastave, te koje bi termini u toku sedmice po njihovom mišljenju bili najbolji za održavanje mektebske nastave. Također u anketi je zatražena ocjena rada muallima kod kojeg njihovo dijete pohađa mektebsku nastavu, ocjenu komunikacije sa muallimom, te koliko je upoznat sa nastavnim planom i programom mektebske nastave.

Na kraju ankete ostavljena je mogućnost da se roditelji izjasne koliko su oni spremni da daju svoj doprinos unapređenju mektebske nastave te da daju određene primjedbe i sugestija a nisu obuhvaćeni predhodnim pitanjima. Rezultati su analizirani na redovnom seminaru imama i date su preporuke za unapređenje mektebske pouke, Ovim projektom vjersko-prosvjetne službe rukovodio je hfz. Ammar Bašić.

8. OGLEDN SATI U MEKTEBIMA ZA ŠKOLSKU 2018/19. GOD.

U sklopu projekta edukacije muallima MIZ-e Sarajevo, Vjersko-prosvjetna služba Medžlisa organizovala je izvođenje oglednih časova u 10 mekteba u vremenskom periodu 07. – 24. januara 2019. godine. Prema planu kojeg je sačinila vjersko-prosvjetna služba, ogledne sate održali su najbolje ocjenjeni muallimi na završnim ispitima za prošlu školsku godinu, a to su: Enver-ef. Hošić, Hazim-ef. Kupalija, Resul-ef. Alić, Asmir-ef. Salihović, hfz. Rijad-ef. Salihović, Muhamed-ef. Abaz, mr. Sulejman-ef. Posavljak, mr. Ahmet-ef. Skopljak i mr. Suad-ef. Balić. Nakon održanog sata svi prisutni muallimi uzeli su učešća u diskusiji u kojoj su dali svoje mišljenje o održanom satu.

Teme oglednih sati bile su različite kao što su bile i različite nastavne grupe koje su odabrali muallimi. Svi ogledni sati održani su prema aktuelnom Plan i programu Rijasetu IZ-e. Primjetno je da muallimi različito pristupaju mektebskoj nastavi, i čak i kad su im isti tipovi sata, nastavne metode ili nastavna jedinica. Osim subjektivnih

faktora, često na atmosferu u razredu utječu i objektivni faktori, kao što je zagrijanost i osvjetljenost učionice, tehnička pomagala, da li je mekteb u urbanom dijelu grada ili se radi o prigradskom džematu.

Muallimi su pohvalili su projekat oglednih sati, a posebno se zahvaljuju mladi imami što im je pružena prilika da se upoznaju sa drugačijim načinom rada u mektebu, te da iznesu i svoja mišljenja o održanom satu ali i općenito o mektebskoj nastavi.

Vjersko-prosvjetna služba će nastojati da i tokom 2019/20. školske godine određeni broj muallima u stalnom radnom odnosu održi ogledne sate i kako bi zaokružili drugi ciklus ovog projekta u naredne dvije godine. Prema planu rada Vjersko- prosvjetne službe, svake tri godine bi svi muallimi trebali održati bar po jedan ogledni sat na kojem će prisustvovati kolege muallimi.

9. ŠKOLA HIFZA KUR'ANA

Dana 21.05.2019. godine, 17. noći mjeseca ramazan 1440. h. g. (Lejletu-l-Bedr) u okviru obilježavanja ove mubarek noći, upriličena je akademija sa najuspješnijim polaznicima *Škole hifza Kur'ana* Medžlisa Islamske zajednice Sarajevo u Sultan Fatihovoj-Carevoj. Na programu su se obratili doc. dr. hfz. Kenan-ef. Musić, glavni imam, te dr. Enes Ljevaković, muftija sarajevski. Istu večer je uz podršku Općine Stari Grad upriličen iftar za polaznike *Škole hifza Kur'ana* i njihove roditelje koji su prisustvovali programu.

Tokom školske 2018/19. godine *Školu hifza Kur'ana* je pohađalo 251 kandidat na 8 punktova a to su: Careva džamija, Hladivode, Ilijaš, Vogošća, Ilidža, Stup, Istiklal i džamija Hadžići, a školu je vodilo 12 hafiza ili hafiskih kandidata.

10. SVEČANA AKADEMIJA POLAZNIKA MEKTEBSKE NASTAVE „KUR'AN PO MOM SRCU PIŠE”

Povodom završetka mektebskih ispita (hatme) i mektebske nastave za školsku 2018/19. godinu, vjersko-prosvjetna služba medžlisa pripremila je svečanu akademiju „Kur'an po mom srcu piše“. Akademija je upriličena 22. juna 2019. godine sa početkom u

9:30 sati u Istiklal džamiji na Otoci. Akademijom smo na svečan način obilježili završetak mektebske nastave na nivou Sarajevskog medžlisa i široj javnosti predstavili učenike koji su u predhodnom periodu završili hatmu, a neki od njih su pri samom završetku hatme.

Na Akademiji je prisustvovalo 1.015 polaznika mektebske nastave i 134 muallima koji su za ovu priliku bili u službenoj odjeći u džubi i ahmediji. Nakon postrojavanja mekteba na platou ispred džamije uz prozivku svih mekteba, sa tekbirima u svečanom defileu imami i djeca ušli su u džamiju. U okviru programa Hor džemata Sokolović kolonije proučio je dvije ilahije, te su uručene zahvalnice polaznicima mektebske nastave koji završavaju osnovno obrazovanje a koji su u predhodnom periodu postizali zapažene rezultate na mektebskim takmičenjima. Prisutnim imamima, polaznicima mektebske nastave i njihovim roditeljima obratili su se doc. dr. hfz. Kenan Musić, glavni imam i mr.sc. Malik-ef. Šljivo, pomoćnik glavnog imama. Polaznici mektebske nastave kojima su uručene zahvalnice „ponos mekteba“ proučili su sureta za poklanjanje hatme koju su dan ranije proučili polaznici mektebske nastave iz 30 Sarajevskih mekteba (jedan džuz jedan mekteb).

Ovakav način obilježavanja završetka mektebske nastave krajem školske godine, nastaviti ćemo organizirati uz bolju medijsku praćenost.

11. VANNASTAVNE AKTIVNOSTI U MEKTEBIMA

Medžlis islamske zajednice Sarajevo kroz različite vannastavne aktivnosti nastoji afirmisati mektebsku nastavu i popularizirati rad u mektebima.

11.1. Kalendar mektebske nastave 2019. god/1440.h. g.

Medžlis islamske zajednice Sarajevo pripremio je i štampao Radni kalendar mektebske nastave za 2019., odnosno 1440. hidžretsku godinu. Na kalendaru je 12 fotografija koje su ocjenjene kao najbolje na “foto konkursu” za mlade u okviru manifestacije “Selam, Ya Resulallah 2018”. Kalendar je rađen u cilju afirmacije mektebske nastave i regulisanja radnih, odnosno neradnih dana na mektebskoj nastavi

tokom školske godine. Na kalendaru su označeni državni praznici i vjerski blagdani (neradni dani u mektebu).

11.2. *Mektebske novine*

Medžlis Islamske zajednice Sarajevo pripremio je i izdao 24. broj *Mektebskih novina*. List je namijenjen polaznicima mektebske nastave, a tretira isključivo teme vezane za mektebsku nastavu: unapređenje nastave, problematika i zapaženi rezultati polaznika i njihovih muallima. Tema ovog broja bio je „Otvoreni mektebski dan“, program u okviru manifestacije Selam, Ya Resulallah.

11.3. *Otvoreni mektebski dan*

U okviru manifestacije Dani o Allahovom Poslaniku “Selam, ja Resulallah“, 24. novembra 2018. godine u *Domu mladih*, KSC Skenderija organiziran je tradicionalni program za najmlađe mekteblije pod nazivom “Otvoreni mektebski dan”.

Uz bogat edukativno-zabavni program, mekteblije su uživale u ilahijama i kasidama te kvizu „Svjetlo znanja“. Takmičari su pokazali zavidno znanje iz Kur'ana, hadisa, historije islama, te općeg znanja, a pitanja su bila prilagođena polaznicima mektebske nastave. Kao gosti programa u kulturno-zabavnom dijelu učestvovali su učenici O.Š. “Mustafa Busuladžić” iz Ahatovića.

11.4. *Plivački miting polaznika mektebske nastave*

Dana, 15. juna 2019. godine u periodu 9:00 – 11:00 sati održan je VII Plivački miting polaznika mektebske nastave koji Medžlis islamske zajednice Sarajevo već tradicionalno organizuje u saradnji sa *Olimpijskim bazenom Otoka*. Na mitingu je učestvovalo 88 takmičara iz 23 Sarajevska mekteba, odnosno džemata. Nakon svečanog defilea intonirana je državna himna i proučen je odlomak iz Časnog Kur'ana, a učač je bio hafiz Abdusamed-ef. Podojak.

U ime vjersko-prosvjetne službe medžlisa prisutnima se obratio pomoćnik glavnog imama MIZ Sarajevo mr. Malik-ef. Šljivo, te iskazao dobrodošlicu djeci i

njihovim roditeljima, kao i muallimima. Na kraju svoga obraćanja, Malik efendija je proglasio Plivački miting sarajevskih mekteba otvorenim.

Nakon vrlo zanimljivog takmičenja po starosnim kategorijama i plivačkim disciplinama, titulu najuspješnijeg mekteba na 7. Plivačkom mitingu Sarajevskih mekteba ponijeli su takmičari iz mekteba Grbavice II, muallim mr. Sejid-ef. Strika sa ukupno 95 bodova. Drugo mjesto pripalo je mekteblijama iz mekteba Istiklal, muallim mr. Ahmet-ef. Skopljak sa 67 bodova, dok su treće mjesto zauzele mekteblije mekteba Lužani, muallim Senaid-ef. Isaković sa 52 bodova.

11.5. Ljetna škola Kur'ana

Tokom mjeseca jula 2019. godine biće izvođena „Ljetna škola Kur'ana“ u 20-tak džamija Sarajevskog medžlisa. Vjersko-prosvjetna služba je u realizaciju programa uključila određeni broj studenata FIN-a. U jednom džematu nismo imali rješenje sa studentima, te smo tamo angažovali imama tog džemata. Muallimi će sa učenicima intezivno uvježbavati učenje Kur'ana gledajući, te će vježbati memorisanje kur'anskih sureta.

Ovogodišnju „Ljetnu školu Kur'ana“ uvrstilo smo u aktivnosti projekta „Ljeto u šeheru“ koji organizuje MIZ-e tokom ljetnjih mjeseci.

11.6. Mektebska liga u malom nogometu

Takmičenje Mektebske lige u malom nogometu koju je organizovao MIZ-e Sarajevo za školsku 2018/19. godinu održano je tokom mjeseca januara i februara 2019. godine. Utakmice su igrane u salama O.Š. „Fatima Gunić“ i sportskoj dvorani KC „Kralj Fahd“, a učestvovalo je 430 igrača iz 45 ekipe (mekteba). Završnica Mektebske lige održana je 16. februara 2019. godine u sportskoj dvorani KC „Kralj Fahd“. U završnicu lige plasirale su se četiri mekteba: Jezero, Zabrđe, Buća Potok i Mrakovo. Prvo mjesto osvojila je ekipa iz Zabrđa koja je u finalu pobijedila ekipu mekteba Jezero, dok je treće mjesto osvojila ekipa iz Buća potoka a četvrto je Mrakovo.

Za pobjedničke ekipe osigurane su medalje i diplome, a prelazni pehar za pobjednika.

11.7. Mektebska liga u odbojci za djevojčice

U cilju afirmacije mekteba i mektebske nastave Vjersko-prosvjetna služba Mežlisa po prvi put je organizovala Mektebsku ligu u odbojci za djevojčice – polaznice mektebske nastave. Ovo takmičenje održano je u fiskulturnoj sali Osnovne škole „Fatima Gunić“ u periodu od 14.-27. januara 2019. godine. Učešće je uzelo 24 ekipe, odnosno mekteba, da bi se u samu završnicu plasirale četiri najuspješnije ekipe: Jezero, Mrakovo, Srednje i Zabrdje. Završnica je održana 16. februara 2019. godine u prijepodnevnim satima. Prvo mjesto osvojila je ekipa mekteba Jezero, drugo je Zabrdje, treće Srednje a četvrto mekteb Mrakovo.

S obzirom da se sportskoj edukaciji, u okviru Plana i programa mektebske nastave iz objektivnih razloga ne posvećuje dovoljna pažnja, Mežlis islamske zajednice Sarajevo svake mektebske godine održava različita sportska takmičenja u cilju popularizacije mekteba, ali i kako bi polaznicima nastave obogatio nastavni sadržaj i usadio im vrline koje se sportom stiču.

Na osnovu reakcija muallima, roditelja i polaznika mektebske nastave ovakav vid druženja za djevojčice naišao je potpuno razumjevanje i podršku Vjersko-prosvjetnoj službi.

Isti dan nakon održanih finalnih utakmica malonogometne i odbojkaške lige, uslijedila je svečana ceremonija proglašenja najboljih i dodjela nagrada i priznanja u obje konkurencije. Odlomak iz Časnog Kur’ana proučio je Mešanović Ahmed, polaznik mektebske nastave u mektebu Zabrdje, nakon čega je uslijedilo intoniranje državne himne i zajedničkog tekbira, sa kojim je počinjala svaka utakmica obje lige.

Učesnicima su se obratili dr. Muhammed Alu Šejh, direktor KC „Kralj Fahd“ i glavni imam MIZ Sarajevo doc. dr. hfz. Kenan-ef. Musić, koji su čestitali svim učesnicima, a najuspješnijima su dodijelili medalje, pojedinačne i ekipne nagrade. Najboljim odbojkašicama medalje i nagrade uručile su uposlenice vjersko-prosvjetne službe Adna Zulić i hafiza Medina Živčić-Moco.

11.8. Jednodnevni izlet sa najuspješnijim takmičarima

U subotu, 06. oktobra 2018. godine Medžlis islamske zajednice Sarajevo organizovao je jednodnevni izlet na relaciji Sarajevo – Jajce za najuspješnije učesnike mektebskog takmičenja u 2018. godini.

Za djecu mnogobrojnih sarajevskih mekteba isplaniran je raznovrstan program posjete kroz bosanskohercegovačke gradove Travnik, Jajce, Turbe i Vitez gdje su djeca bila u prilici posjetiti historijske znamenitosti, prirodne ljepote domovine i prelijepu džamije. Uz turističkog vodiča djeca su slušala i historijsko-edukativni čas o Plivskim vodopadima, katakombama, mnogobrojnim vakufima i džamijama u Jajcu, a u povratku je organizovana i posjeta Mlinčićima na rijeci Plivi, poznatoj turističkoj atrakciji.

ZAKLJUČCI I PRIJEDLOZI

- a)** broj upisanih i redovnih polaznika mektebske nastave u ovoj školskoj godini veći je u odnosu na prethodnu. Smatramo, da je jedan od razloga što je početak nove mektebske godine transparentno najavljena putem plakata, radija i televizije. Također su na najbolji način iskorištene razne svečanosti u džamijama za oglašavanje i pozivanje roditelja da svoju djecu šalju na mektebsku nastavu. Međutim, ukoliko se uzme u obzir da je broj djece u osnovnim školama oko 38 000, a u srednjim 16 000, smatramo da se treba još mnogo više uraditi na popularizaciji mektebske nastave.
- b)** smatramo da većina muallima radi kvalitetno na mektebskoj nastavi i odgovorno se odnosi prema radu;
- c)** nastaviti sa nagrađivanjem muallima za postignute rezultate na završnim ispitima, takmičenju i drugim oblicima rada u mektebu;
- d)** nastaviti sa projektom oglednih sati i u narednoj školskoj godini, te mladim imamima bez iskustava u radu na mektebskoj nastavi odrediti mentor muallime. Primjetno je da se nekim muallimima treba pomoći tako što će im se posvetiti više pažnje i dodjeliti mentor koji će ga usmjeravati u radu na mektebskoj nastavi;

- e) u cilju omasovljavanja broja polaznika mektebske nastave treba osmisлити i realizovati nove programe koji će kod roditelja i polaznika afirmisati mektebsku nastavu. Sadržaji programa bi trebali biti kulturnog, edukativnog, muzičkog, sportskog i sličnog karaktera;
- f) organizovanje stručnih seminara za muallime na kojima bi se upoznali sa savremenim nastavnim metodama rada;
- g) treba koristiti oba školska raspusta da se organizuju intezivni kursevi učenja Kur'ana, zimske i ljetne škole islama u prirodi.
- h) neophodno je intezivirati rad - kontinuiran sa srednjoškolcima i to u suradnji sa vjeroučiteljima i kroz sadržaje mreže mladih medžlisa;
- i) vjersko-prosvjetna služba će nastojati da se sistematično sabere podatci o svakom polazniku mektebske nastave i da se formira baza podataka kroz koju ćemo pratiti svako dijete koje se upiše u mekteb;
- j) komisija za unapređenje mektebske nastave će u suradnji sa muallimima detaljno razraditi novi nastavni plan i program koji će stupiti na snagu u novoj školskoj godini, zatim uraditi pismene pripreme koje moći koristiti za svoje priprema nastavnih sati, te prilagoditi završne ispite novim plan i programom.
- k) vjersko-prosvjetna služba će izvršiti analizu rada škole hifza u proteklom period sa nositeljima aktivnosti imamima-hafizima i napraviti plan za 2019/2020. godinu;
- l) vjersko-prosvjetna služba će početi sa umrežavanjem svršenika hatmi počevši sa dječacima i djevojčicama koji su ove 2018/2019. završili hatmu kako bi se time jačao rad sa mladima;
- m) vjersko-prosvjetna služba će izvršiti analizu vannastavnih aktivnosti mekteba i ponuditi modus kontinuiranih sadržaja tokom čitave mektebske godine.

Uz izvještaj prilažemo:

1. *Izvještaj o završnom takmičenju polaznika mektebske nastave za 2018/19. Školsku godinu*
2. *Statistički podaci o mektebskoj nastavi za 2018/19. školsku godinu*
3. *Konačni rezultati Završnih ispita za 2018/19. školsku godinu*

GLAVNI IMAM;
doc. dr. hfz. Kenan-ef Musić